

दिनांक : 08.02.2026

समय : 18.45 बजे

आकाशवाणी जयपुर—अजमेर

प्रादेशिक समाचार

- भारत अर मलेशिया रे बीच रक्षा—सुरक्षा अर आर्थिक विषयां मांय साझेदारी बढाबा माथे सहमति—प्रधानमंत्री नरेन्द्र मोदी दोन्यू देशां रे बीच संबंधा ने ऐतिहासिक बताया।
- मुख्यमंत्री भजन लाल शर्मा ग्राम उत्थान शिविरां ने विकास रो महताउं आधार बताया—अलवर ने 152 करोड़ रुपया सूं बत्ती री परियोजनावां री सौगात।
- भाजपा प्रदेश अध्यक्ष मदन राठौड़ राज्य रा आवता बजट ने लोगां री उम्मीदां रे मुजब होबा री आस जताई।
- मुकुन्दरा टाइगर रिजर्व रा कोर ऐरिया मांय सफारी री मंजूरी मिली।

000

प्रधानमंत्री नरेन्द्र मोदी आज कुआलालपुर मांय मलेशिया रा प्रधानमंत्री अनवर इब्राहिम रे सागे द्विपक्षीय बातचीत करी। इण मांय दोन्यू देशां रे बीच रक्षा अर सुरक्षा संबंधां ने बढाबा माली अर नवाचार साझेदारी माथे जोर दियो गयो। इण दौरान दोन्यू पक्ष केई समझौता माथे दस्तखत कर्या। इण मांय आपदा प्रबंधन, ऑडियो विजुअल सह—निर्माण, भ्रष्टाचार निवारण अर रोकथाम, सेमीकंडक्टर विकास, स्वास्थ्य अर औषधि, छात्रवृत्ति रा संस्थान अर एनपीसीआई इंटरनेशनल पेमेंट्स लिमिटेड अर पेनेट ऑफ मलेशिया रे बीच रा समझौता ज्ञापन भेळा हैं। प्रधानमंत्री कह्या के भारत अर मलेशिया रे बीच समुद्री सुरक्षा, रक्षा अर आतंकवाद सूं मुकाबला संबंधी इमदाद मांय बढावो व्हेला। वे कह्यो के आतंकवाद माथे भारत री सोच साफ है अर आतंकवाद सूं कोई समझौतो नी कर्यो जावेला। प्रधानमंत्री कह्या के समुद्री पडोसी होबा रे नाते भारत अर मलेशिया रे बीच एक खास संबंध है। वणां मजबूत जन—संबंध अर मलेशिया मांय प्रवासी भारतीयां री मौजूदगी रो जिक करया।

.....
प्रधानमंत्री मोदी मुख्य कार्यकारी अधिकारियां रा एक सम्मेलन मांय शामिल व्ह्या। इण सम्मेलन मांय निवेश रा मौका अर न्यारा—न्यारा हलका मांय इमदाद री दरकार माथे चर्चा करी गयी। इण सूं पैली प्रधानमंत्री आसियान री कानी भारत री वचनबद्धता ने दोहराया अर आसियान री अध्यक्षता माथे मलेशिया ने बधाई दी।

000

मुख्यमंत्री भजनलाल शर्मा कह्या के विकसित भारत रा लक्ष्य ने साकार करबा खातर केन्द्र रे सागे वां री सरकार लगातार काम कर रही है। वणां कह्या के किसान, मजूर अर पशुपालका समेत आखिरी छोर रा व्यक्ति तांई जनकल्याणकारी योजनावां री पूग पक्की करबा खातर गिरदारवर सर्कल माथे ग्राम उत्थान शिविर लगाया जा रह्या है। रामगढ़ रा बहला मांय राख्या ग्राम उत्थान शिविर ने संबोधित करता थकां मुख्यमंत्री कह्या के इण शिविरां रे मार्फत सरकार पात्र लोगां तांई पूगबा री कोशिश कर री है। मुख्यमंत्री गांव वाळा सूं आं शिविरां ऊं बत्ता ऊं बत्तो फायदो लेबा ने कहता थका कह्या के प्रधानमंत्री नरेन्द्र मोदी गांवा ने आत्मनिर्भर अर मजबूत बणाबा री रूप रेखा बणायी है।

.....

ई दौरान मुख्यमंत्री उणरी सरकार कानी ऊं सरू करी गयी कल्याणकारी योजनावां अर आमजन सूं जुड़या फैसला ने गिणाता थकां अलवर शहर ने 152 करोड़ रुपया सूं बत्ती विकास परियोजनावां री सौगात दी। कार्यक्रम मांय केन्द्रीय वन, पर्यावरण अर जलवायु परिवर्तन मंत्री भूपेन्द्र यादव कह्या के पंडित दीनदयाल उपाध्याय रा विचार अर सबका साथ, सबका विश्वास पक्को करता थकां विकसित राजस्थान ने तेजी सूं आगे बढ़ा रियो है। ई दौरान वन अर पर्यावरण राज्य मंत्री संजय शर्मा अर स्थानीय विधायक अर जनप्रतिनिधि मौजूद रिया। इणसूं पैली मुख्यमंत्री अर केन्द्रीय मंत्री सुंवारे अन्तर्राष्ट्रीय टाइगर मैराथन ने हरी झण्डी दिखा र रवाना कर्या। दौड़ मांय भारत समेत आठ देशां रा 18 हजार सूं बत्ता धावक भाग लीना।

000

प्रदेश मांय लगाया जा रह्या ग्राम उत्थान शिविरां मांय आम गांव वाळा रे सागे काश्तकारां ने भी फायदो मिल रह्यो है। किसान परम्परागत खेती मांय बदलाव अर नवाचार कर केन्द्र अर राज्य सरकार री योजनावां रो फायदो ले रिया है। अलवर रा रामगढ बहाला मांय लगाया गया शिविर मांय प्रगतिशील काश्तकार आकाशवाणी सूं बातचीत मांय सरकार रो आभार जताया।

0000

भारतीय जनता पार्टी रा प्रदेश अध्यक्ष मदन राठौड़ कह्या के राज्य रो आबा वाळो बजट आमजन री इच्छावा ने पूरी करेला, जिणसूं आम लोगां रो जीवन चौखो व्हेला। पाली मांय खबरनवीसां सूं बातचीत मांय वणां कह्या के भारत-अमेरीका रे बीच टेरिफ समझौता सूं किसानां रो कल्याण व्हेला अर देश रो निर्यात बढ़ेला। वणां विपक्षी पार्टियां माथे निशानो साधता थकां कह्या के भारत-अमेरीका टैरिफ माथे जनता ने गुमराह करी है, जदके इण समझौता सूं देश ने फायदो पूगेला।

00000

फागुन महीना रा दिन चढबा रे सागे ही प्रदेश मांय तेज सर्दी रो असर कम व्हे रियो है। बीत्या चौबीस घंटां रे दौरान बत्ती ठोडां माथे बत्तो तापमान 25 डिग्री सेल्सियस सूं ऊपर नाप्यो गयो। पश्चिमी जिलां मांय दिन री टेम धूप री तल्खी बढ़ री है। वठीने पूर्वी-उत्तरी हलका मांय भी सुंवारे अर सिंज्या री सर्दी रेह गयी है। मौसम विज्ञान केंद्र जयपुर रे मुजब राज्य मांय आवता एक हफ्ता ताई मौसम साफ रेहवेला। वठीने मौसम मांय बदलाव सूं मौसमी बीमारियां रो खतरो बढ़ग्यो है। सफाखाना मांय सर्दी, जुकाम अर बुखार रा मरीज लगातार बढ़ रह्या है।

0000

कोटा सूं सट्या मुकुन्दरा टाइगर रिजर्व मांय अबे सैलानी बेगी ही बाघ देख सकेला। वन महकमा ने कोर ऐरिया मांय सफारी री मंजूरी मिल गयी है। म्हाका खबरनवीस रे मुजब सैलानियां खातर टाइगर रिजर्व रा 35 किलोमीटर रा हलका मांय घूमबा वास्ते नयो रास्तो तैयार कर्यो गयो है।

0000

राजसमंद रा नाथद्वारा रा श्रीनाथ जी मन्दर मांय आज फागुन सप्तमी माथे परम्पारिक तरीका ऊं पाटोत्सव मनायो गयो। इण दौरान ठाकुर जी री गुलाल अर अबीर सूं फाग खिलायो गयो। इण मौके बड़ी संख्या मांय मौजूद सिरधालू रसिया गार एक दूजा माथे रंग डाल्यो। इण मौके ठाकुर जी ने केसर रा दूध रो भोग लगायो गयो।

0000

मोट्यारां मांय शारीरिक क्षमता ने बढ़ावो देबा अर खेलां री कानी ऊं रुझान बढ़ाबा खातर पाली मांय आज सूं तीसरी जिला स्तरीय रोलर स्पोर्ट्स होड सरू व्ही। रोलर्स स्पोर्ट संगठन री कानी ऊं राख्खी ई होड मांय इनलाइन स्केटिंग, आर्टिस्टिक, फ्रीस्टाइल समेत केई स्केटिंग्स होडा राख्खी जा री है। प्रतियोगिता रा जिला प्रभारी मोहम्मद आसिफ बताया के रोलर स्केटिंग खातर मोट्यार जोश दिखा रिया है।

.....

0000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम “मन की बात” मांय 22 फरवरी ने विचार बतावेला। आ ई कार्यक्रम री 131वीं कड़ी व्हेला। ई सारू आप ई मुफ्त नम्बर 1800—11—7800 माथे राय दे सको हो। ई रे अलावा नरेन्द्र मोदी एप अर माय जीओवी ओपन फोरम रे ज़रिए ई 20 फरवरी ताई विचार भेज्या जा सके है।

0000

केंद्रीय प्रत्यक्ष कर बोर्ड आयकर अधिनियम, 2025 सूं जुड्या प्रस्तावित आयकर नियम अर प्रपत्र माथे हितधारकां सूं सुझाव मांग्या है। आयकर अधिनियम-2025 ने लारला बरस अगस्त मांय राष्ट्रपति मंजूरी दी ही, जो आवती पैली अप्रैल सूं लागू व्हेला। वित्त मंत्रालय कह्यो के अंतिम अधिसूचना ऊं पैली प्रस्तावित आयकर नियम अर फार्म अधिकारिक वेबसाइट माथे अपलोड कर दिया गया है। भाषा ने सरल बणाबा, मुकदमां अर अनुपालन बोझ ने कम करबा अर गैर जरूरी अर काम मांय नी आबा वाळा नियम अर प्रपत्रां री पिछाण करबा बाबत सुझाव मांग्या गया है।

0000

केन्द्रीय संस्कृति अर पर्यटन मंत्री गजेंद्र सिंह शेखावत कह्या के अबार रो केन्द्रीय बजट निरंतरता, स्थिरता अर सतत विकास ने दरसावे है। शिमला मांय केन्द्रीय बजट माथे संवाद कार्यक्रम मांय वे कह्या के प्रधानमंत्री नरेन्द्र मोदी री अगुवाई मांय लारला 11 बरसा सूं विकसित भारत रा लक्ष्य री दिशा मांय लगातार कोशिश करी जा री है। वे कह्या के कोविड महामारी रे पाछे भारत प्रधानमंत्री री अगुवाई मांय विश्व अर्थव्यवस्था मांय चौथी ठोड हासिल करी है।

0000